

# Aura Town n Gown UTHM di Batu Pahat

BATU PAHAT 5 Okt. – Aura perarakan menyeras dalam tubuh para hadirin sehingga menjelmakan semangat berkobar-kobar untuk mengejar kejayaan menerusi pengisian ilmu.

Mungkin itu rumusan bagi menggambarkan tentang perarakan konvokesyen *Town n Gown* Universiti Teknologi Tun Hussein Onn Malaysia (UTHM) yang diadakan di pusat bandar Sabtu lalu.

Perarakan itu diadakan bertujuan mengedukasikan kepada orang ramai tentang Majlis Konvokesyen UTHM yang akan berlangsung pada 10 hingga 12 Oktober ini.

Bermula kira-kira 8.30 malam, perarakan 1,835 peserta daripada 35 kontinjen yang diketuai Unit Berkuda Polis Diraja Malaysia (PDRM) menggegarkan malam minggu di pusat bandar.

Aura perarakan tentunya dirasai apabila melihat alumni UTHM yang lengkap berpakaian jubah konvokesyen diarak di tengah bandar dengan kereta berhias.

Orang ramai dilihat melambai-lambai ke arah si pemakai jubah itu, sebagai tanda kagum dan penghargaan terhadap warga intelek universiti yang menjadi inspirasi dan tulang belakang pembangunan di daerah ini.

Perarakan sejauh 2.58 kilometer itu melalui beberapa jalan utama di pusat bandar iaitu Jalan Ampuan, Jalan Mohd. Saleh, Jalan Rahmad dan berakhir dengan semua peserta berhimpun di Stadium Batu Pahat.

Kemuncak perarakan adalah upacara pembacaan pengisytiharan dan penyerahan skrol konvokesyen kepada Pegawai Daerah, Norizan Kulob.


Pihak universiti juga bijak mengatur program dengan menerapkan unsur hiburan yang berjaya memukau pengunjung.

Bagaikan pesta, pertunjukan bunga api menghasilkan pemandangan indah meng-

hiasi langit Batu Pahat yang mendapat tepukan dan sorakan gemuruh hadirin.

Tidak cukup dengan itu, Unit Berkuda PDRM menampilkan persembahan akrobatik termasuk melompat halangan berapi yang menghadirkan debaran dan kekaguman para pengunjung.

Naib Canselor UTHM, Prof. Datuk Mohd. Noh Dalimin pasti menjadi orang yang paling gembira apabila Norizan dalam ucapan perasmian menyatakan perarakan itu adalah produk pelancongan terbaik daerah ini dan sangat sesuai disenaraikan dalam kalendar pelancongan negeri.



BRASS Band Rela Zon Selatan turut mengadakan persembahan di Batu Pahat, baru-baru ini.

➤ BAGAIKAN pesta, pertunjukan bunga api memeriahkan perarakan *Town n Gown* di Batu Pahat, baru-baru ini.